

ALOFA TUNOA, ALOFA MA LE MAFUTAGA




Lesona 13 mo Setema 26, 2026



“'Ia ia te outou
uma lava le alofa
tunoa o le Alii o
Iesu Keriso, ma
le alofa o le
Atua, atoa ma le
mafuta faatasi
ma le Agaga
Paia. Amene.”
(2 Korinito 13:14, soV)

O le fuaiupu e masani ona fa'aaogā i le fa'ai'uga o tusi a Paulo—lea e fa'aaogā fa'atasi ma ni nai suiga laiti i le 13 o ana tusi e 14—o le: “Ia i ai 'iā te outou le alofa tunoa o lo tatou Ali'i o Iesu Keriso” (Rom 16:24; 1 Kori. 16:23; Kala. 6:18; Efe. 6:24; Fili. 4:23; Kolo. 4:18; 1 Tesa. 5:28; 2 Tesa. 3:18; 1 Tim 6:21; 2 Tim 4:22; Tit 3:15; File 1:25; Epe. 13:25).

Ae peita'i, i le tusi lona lua i Korinito, na ia ta'ua ai se tulaga fa'apitoa e ese mai ai. O lana fa'amavaega e aofia ai le alofa tunoa, le alofa, ma le mafutaga a i latou uma o le Aiga Atua e tolu: o le Alo, o le Tama, ma le Agaga Pa'ia (2 Korinito 13:14).



“Alofa tunoa o le Alii o Iesu Keriso”



“O le alofa o le Atua”



“Mafutaga a le Agaga Paia”



“Faatasi ma outou uma”

“ALOFA TUNOA O LE ALII O IESU KERISO

“Auā ua outou iloa le alofa tunoa o lo tatou Alii o Iesu Keriso, sa tamaoaiga ia, a ua faamativaina ona o outou, ina ia faatamaoaigaina outou i lona mativa.” (2 Korinito 8:9)

E amata ma fa'ai'u e Paulo lana tusi lona lua i tagata Korinito i le ta'ua o le alofa tunoa o Iesu (2 Korinito 1:2; 13:14). O le ā tonu lava lenei alofa tunoa?



Na ia tu'ua le tamaoaiga e fa'avavau o le lagi ma avea ma tagata mativa, ina ia mafai ai ona tatou maua lana tamaoaiga (2 Kor 8:9).



Sa savali o Ia i lo tatou lalolagi ina ia tatou iloa ai o Ia, alofa ia te Ia, ma fa'aa'oa'o ia te Ia (Ioane 15:12)



Sa ia fa'amaulalo o ia lava ma usiusita'i se'ia o'o i le oti, ina ia fa'amagalo a tatou agasala ma foa'i mai ai le ola e fa'avavau (Filipi 2:8).

O le ā e tupu ia i tatou o e taliaina Lona alofa tunoa?

Ua tauamiotonu tatou (Rom. 3:24; Efe. 1:7)

Tatou olioli i le faamoemoe (Rom. 5:2)

Tatou maua le mana mai ia Keriso (2 Kor. 12:9)

E le pule le agasala ia i tatou (Rom. 6:14)


Tatou te nofotupu i le ola ma Iesu (Rom. 5:17, 21)



“O LE ALOFA O LE ATUA” (1)

“O se le alofa ua le iloa e ia le Atua; auā o le Atua, o le alofa lava ia.” (1 Ioane 4:8)

Ua fa'amamafa mai le Tusi Pa'ia fa'apea, o le Atua o le alofa lava ia (1 Ioane 4:8). Ua la liligiina atu lenā alofa i Ana foafoaga uma. E mafai ona tatou va'aia lenā mea i o tatou lava loto; i le va o mātua ma fanau; i fugāla'au matagofie; i manulele e matagofie a latou pese; ...



Na a'oa'o atu e Paulo i tagata Korinito (fa'apea fo'i i tatou) e fa'apea, o le alofa e fa'atupuina ai le malosi ma le tuputupu a'e (1 Kori. 8:1); e leai se aogā o se mea pe a leai se alofa (1 Kori. 13:1-3); ma e tataua ona faia mea uma i lea lava alofa e sau mai le Atua (1 Kori. 16:14). Ae peita'i, e leai se masalosalo, o le fa'aaliga sili o le alofa o le Atua e mafai ona va'aia i le foa'iina mai o Iesu e fai ma taulaga mo agasala (Ioa 3:16).

O lenei fa'ata'ita'iga e ta'ita'iina ai i tatou e feagai ma isi i le alofa lava lea e tasi ua fa'aalia mai e le Atua ia i tatou (1 Ioane 3:16).

“O LE ALOFA O LE ATUA” (2)

“Le au uso e, o le toe upu lenei; ia outou manuia, ia faaatoatoaina outou, ia faamafanafanaina outou, ia loto gatasitasi outou, ia outou fifilemu; ona ia te outou lea o le Atua e ona le alofa ma le manuia.” (2 Korinito 13:11)

Ua fa’aalia e Paulo le Atua i ni auala eseese:



“Le Atua o le onosai” (Rom. 15:5)



“Le Atua o le faamoemoe” (Rom. 15:13)



“Le Atua o le filemu” (Rom. 15:33)



“Le Atua [...] alofa mutimutivale” (2 Kor. 1:3a)



“Le Atua o fa'amafanafanaga uma” (2 Kor. 1:3b)



“Le Atua o le alofa (Kor. 13:11)



E lē gata ina iai i le Atua nei uiga uma, ae o la fo’i o le puna e afua mai ai nei mea uma mo i tatou.

E pei ona tatou va’aia, o le Atua o le alofa lava ia, ae o la fo’i o le Atua o le alofa, o lona uiga:



O le Atua le Tamā e foa’i mai ia i tatou Lona alofa.
(1 Ioane 3:1)



Le Atua le Alo na te faatumu tatou i le tumu o Lona alofa.
(Efe. 3:19)



Le Atua le Agaga Paia na te sasaa mai lona alofa i o tatou luga (Rom. 5:5)

“MAFUTAGA A LE AGAGA PAIA”

“Ia ia te outou uma lava le alofa tunoa o le Alii o Iesu Keriso, ma le alofa o le Atua, atoa ma le mafuta faatasi ma le Agaga Paia. Amene.” (2 Korinito 13:14)

Faanaunauga o Paulo ia maua e tatou: o le alofa tunoa o se Tagata (o le Alii o Iesu Keriso); o le alofa o se Tagata (o le Atua); ma le mafutaga... o se mana po o se Tagata? (2 Korinito 13:14). Ina ia ogatasi le uiga o le mau, o loo tautala Paulo e uiga i se Tagata (o le Agaga Paia), ae lē o se mana.

I ana fa’asinomaga e sili atu ma le 40 e faatatau i le Agaga Pa’ia i ana tusi ia Korinito, o lo’o fa’aalia ai e Paulo o la o Lē e i ai uiga fa’aleperesona, ae lē na’o se malosiaga e afua mai i le Atua:



Faauegaina tagata mo le misiona
(1 Kor. 2:4)

Na te faailoa mai mea loloto a le Atua
(1 Kor. 2:10)

Na te aoao mai ia i tatou (1 Kor. 2:13)

E afio i totonu o i tatou (1 Kor. 3:16)

Galulue ma Keriso mo lo tatou tauamiotonuina
(1 Kor. 6:11)

E foa'i mai e la meaalofa fa'aleagaga.
(1 Kor. 12:7-11)

Ua la fa’ailogaina i tatou mo le fa’aolataga
(2 Kor. 1:22)

Na te tusia le tulafono i o tatou loto. (2 Kor. 3:3)

Na te aumaia le ola fou ia Keriso (2 Kor. 3:6)


Na te aumaia le saolotoga mai le agasala
(2 Kor. 3:17)

“FAATASI MA OUTOU UMA”

“o e ua filifilia e tusa mona muai silafia e le Atua le Tamā, i le faapaiaina e le Agaga, ia iu ai i le gauai ma le saaluuga o le toto o Iesu Keriso; ia faateleina ia te outou le alofa tunoa ma le manuia.” (1 Peteru 1:2 SOV)

E ui ina masani ona tatou ta’ua le Tolutasi (o Peresona paia e to’atolu, e tasi le Atua) i le fa’asologa “Tama, Alo, ma le Agaga” (Mat 28:19), ae o loo fa’aalia e Paulo i le fa’asologa “Alo, Tama, ma le Agaga” (2 Kor 13:14), a o Peteru o loo ia ta’ua “Tama, Agaga, ma le Alo” (1 Pet 1:2).

E leai se fa'atulagaga o tulaga maualuluga ma tulaga maualalo i le va o i latou; e tofua lava i latou ma se matafaioi i le fuafuaga o le fa'aolataga, ae o lo'o tutusa uma o latou uiga ma fa'amoemoega.



O lea, ua fa’ai’u ai e Paulo lana tusi i le mo’omia ia fa’atasi ma i tatou uma le alofa tunoa, le alofa, ma le mafutaga a le Atua i ona tulaga e tolu (2 Korinito 13:14).

E lē mafai ona fa'amatalaina le Tamā e ala i mea o le lalolagi. O le Tamā o le atoaga lea o le Atua i le tino, ma e lē mafai ona va'aia e mata o tagata.

O le Alo o le atoaga lea o le Atua ua fa'aalia mai. [...]

O le Fesoasoani na folafola e Keriso e auina mai ina ua mavae Lona afio a'e i le lagi, o le Agaga lea o loo i ai le atoaga o le Atua, o Lē na te faaalia le mana o le alofa tunoa faalelagi ia i latou uma e talia ma faatuatua ia Keriso o lo latou Faaola totino. E to'atolu pelesona soifua o le Aiga Atua o le lagi; i le suafa o nei mana tetele e tolu—o le Tama, o le Alo, ma le Agaga Paia—e papatisoina ai i latou o e talia Keriso i le faatuatua moni, ma o le a galulue faatasi nei mana ma e o agai atu i le lagi o e usiusitai, i a latou taumafaiga e ola ai i le olaga fou ia Keriso.